

汝南輔史

汝南圃史卷之四目錄

木果部

枇杷

楊梅

柰

林檎蘋婆附

榛

葡萄

銀杏

棗

栗

胡桃

柿

橘

柚柑附

橙

香櫟附

汝南圃史卷之四目錄

汝南圃史卷之四

吳郡周文華含章補次

木果部

枇杷

枇杷葉似琵琶故名一名盧橘唐子西云枇杷
盧橘一也而上林賦曰盧橘夏熟又曰枇杷
檮栳則顯然二物吳曾引張勃吳錄云建安
郡中有橘冬月於樹上覆裹之至明年春夏

色變青黑味尤絕美魏主花木志云蜀土有
給客橙亦名盧橘乃知枇杷不當冒盧橘之
名矣唯廣人呼盧橘爲枇杷遂以枇杷爲盧
橘圖經本草曰枇杷木高丈餘葉作驢耳形
背有毛其本陰密枝葉婆娑四時不凋盛冬
開白花至三四月成實故謝瞻賦云稟金秋
之青條抱東陽之和氣肇寒葩於結霜成炎
果乎纖露其作實毬如黃梅皮肉甚薄中核

如小栗四月採葉暴乾治肺氣止渴疾漳州
志云春果已過夏果未成此果適熟故諺有
枇杷黃果子荒之說蘇州志云枇杷肉厚味
甘或有核者小如椒故名椒子枇杷春三月
宜用本色接按果經謂此本初接則核小再
接則無核便民圖纂云以核種之卽出待長
移栽宜用淋過淡灰壅根若澆糞則葉謝本
死

楊梅

楊梅如楮實有紅紫白三色以五月中熟圖經
本草曰楊梅亦生江嶺南其本若荔枝而葉
細陰厚其實生青熟紅肉在核上無皮殼核
中有仁甚香王薏守會稽童貫患腳氣或云
楊梅仁可療疑獻五十石因擢待制忠雅云
楊梅樹不甚高大實如彈丸始青中紅終紫
味酸而甜多生包山等處江南佳果也楊州

有一種白者土人呼爲聖僧梅張司空言地瘴生楊梅恐非至論吳邑志曰楊梅爲吳中名品出光福山銅坑第一聚塢次之洞庭所產尤多唯宜醃以行遠其他蜜漬礬收火燻糖浸皆有法西湖游覽志曰楊梅諸山多有之而煙霞塢東墓嶺十八澗皋亭山者肉鬆核小味尤甜美閩廣人盛稱荔枝無物可比或以西涼蒲萄當之然總不若吳越楊梅也

柯正平詩云五月楊梅已滿林初疑一一價
千金味方河朔蒲萄重色比瀘南荔子深則
古人已有舉而方之矣便民圖纂云六月間
糞池浸核取出收盒二月鉏種待長尺許次
年三月移栽三四年後接以別樹生子枝條
復栽山地多畱宿土臘月開溝於根旁高處
離四五尺許以灰糞壅之不宜著根每遇雨
肥水滲下則結子肥大楊梅種宜山地平土

雖可移植子小不肥結亦甚少或云以青石屑拌黃土種之糞以羊矢則盛又云桑上接楊梅生子不酸樹或生癩以甘草釘之

柰 林檎蘋婆附

柰俗名花紅晉成帝時三吳女子相與簪白花
望之如素柰謠言天公織女死爲之著服則
柰花當白色而南土花紅花作粉紅黃精鉤
吻豈是耳鑒耶別有一種曰林檎一名來禽
洪玉父云以其味甘來衆禽也王右軍有來
禽青柰帖而周興嗣所編千字文亦云果珍
李柰則柰與李俱非常品本草曰林檎味酸

甘溫不可多食其樹似柰其形圓亦如柰陳
士奇云此有三種長大者爲柰圓者林檎夏
熟小者味澀爲柰秋熟本草又曰柰味苦寒
多食令人臃漲病人尤甚陶隱居云江東乃
有而北地最豐皆作脯不宜人有林檎相似
而小亦恐非益人也齊民要術曰柰有白青
赤三種張掖有白柰酒泉有赤柰西北方多
柰家家作脯數十百斛以爲蓄積如收藏棗

栗作柰脯法於柰熟時中破曝乾卽成王氏
農書曰柰與林檎形相似也氣味相近也然
柰性寒林檎性溫則有不同按洛陽花木記
林檎之別有六蜜林檎花紅林檎水林檎金
林檎操林檎轉身林檎柰之別有十蜜柰大
柰紅柰兔鬚柰寒毬黃寒毬蘋蒲海紅大楸
子小楸子今吳下總名花紅不知林檎與柰
何別花紅以二月開花花如海棠結子至六

月中熟有極大者甘鬆可食吳郡志云蜜林
檣味極甘如蜜雖未大熟亦無酸味本品中
第一北都尤貴之他林檎雖硬大且酣紅亦
有酸味鄉人謂之平林檎或曰花紅林檎皆
在蜜林檎之下然則花紅之名在宋已然矣
蘇州志云好事者以枝頭向陽未熟時剪紙
爲花鳥貼其上待紅熟乃去紙則花紋燿燦
入盤飣可愛便民圖纂云花紅將根上發起

小條臘月移栽然此木非接不結接用本色
二月八月皆可接其樹多蟲有蛀蛀屑卽爲
蟲穴時時以鐵線鈎取用百部或杉木釘塞
其竅生毛蟲則以魚腥水潑根或埋蠶蛾於
地下別有金林檎花尤勝而實比花紅爲最
小熟亦最遲吳郡志云金林檎以花爲貴紹
興間有南京得接頭至行都禁中接成其花
豐腴艷美百種皆在下風始時折賜一枝惟

貴戚諸王家方得之其後流傳至吳中今所
在園亭皆有此花雖多而貴自若亦須至八
九月始熟是時已無夏果人家亦以飣盤此
花知者以爲金林檎而不知者以爲西府海
棠也若蘋蒲則出北直山東等處其味甘香
細膩山東通志云林檎出章丘益都兗亦有
之有甘酢二種甘者早熟酢者差晚又云蘋
婆大如柑橘色青山東多有之亦曰苹坡蘋

婆夏初亦未可啖秋深味全別有呼刺賓沙
果皆其類也而形味差減

榛

榛叢生葉如麻而闊大四月花開色白如栗花
結實作毬毬中有核卽榛也核中有仁白色
甘味本出北地今吳中園圃間有之齊民要
術曰周官曰榛似栗而小說文曰榛似梓實
如小栗衛詩曰山有榛詩義疏云榛栗屬或
從木有兩種其一種大小枝葉皆如栗子形
似杼子味亦如栗所謂樹之榛栗者其一種

枝莖如木蓼葉如牛李色生高丈餘其核中
悉如李生作胡桃味膏燭又美亦可食噉漁
陽遼代上黨俱饒其枝莖生樵藝燭明而無
煙栽種與栗同按賈說後一種卽今所謂榛
子也爾雅翼曰鄭注云榛似栗而小關中鄜
坊甚多然則其字從秦蓋此意也邶詩曰山
有榛云誰之思西方美人早麓之詩曰瞻彼
早麓榛楸濟濟說者以榛可爲贅爲文事楸

可爲矢爲武事是不然榛楛皆用之武事說
文榛木也一曰藪也春秋傳所謂致師者左
射以藪藪蓋矢之善者傳云女贄不過榛栗
棗修則又兩者皆可用本草曰榛子味甘平
無毒主益氣力寬腸胃令人不饑健行生遼
東山谷樹高丈許子如小栗軍行食之當糧
中土亦有

葡萄

葡萄胡種漢武帝使張騫至大宛攜歸於離宮
別館盡種之有黃白黑三種圖經本草云葡
萄生隴西五原燉煌山谷今河東及近京諸
郡皆有苗作藤蔓而極長大盛者一二本綿
亘山谷花極細黃白色其實有紫白二色而
形有圓銳二種又有無核者七八月熟取其
汁可以釀酒魏文帝詔云醉酒宿醒掩露而

食甘而不餽酸而不酢冷而不寒除煩解悁
他方之果寧有匹者今有二種紫者名馬乳
白者名水晶吳邑志云葡萄熟時紫黑有漿
然其顆不大又雜以青紅江南產終不如北
農桑撮要云二月插葡萄先於去年冬間截
取藤枝旺者約長三尺埋窖於熟糞內候春
間樹木萌芽時取出看有芽生以藤杆蘿蔔
內埋二尺在土中生根畱三五寸在土外苗

長蔓延作架承之須以糞熟肥汁放冷澆灌
三日後以水解之早則輕鋤根旁沃以清水
至結子時剪去繁葉使受夜露冬月收藤用
草包護二三月間皆可挿栽癸辛襍識云正
月將盡取葡萄枝長四五尺者卷爲小圈令
緊先治地令土肥鬆種之止畱二節在外異
時春氣發動衆萌盡吐而土中之節不能條
達則盡瘁英華於出土之二節不二年成大

棚大如棗而多液居家必用云栽葡萄於棗
樹邊於春間鑽棗樹作一竅引葡萄枝入竅
內透出伺二三年其枝長大塞滿斫去葡萄
根托棗爲生其實如棗復用麝香入其根皮
以米泔和黑豆汁澆更有香味元遺山葡萄
酒賦序云劉光甫爲予言安邑多葡萄而人
不知有釀酒法少日常摘其實并米炊之釀
雖成而不佳貞祐中鄰里一民家避寇自山

中歸見竹器所貯葡萄在空盎中者枝蒂已
乾而汁畱盎中薰然有酒氣飲之良酒也蓋
久而腐敗自然成酒不傳之秘一朝而發之
予亦嘗見還自西域者云大石人絞葡萄漿
封而埋之未幾成酒愈久愈佳有藏至千斛
者其說正與此合岳季方云酉陽雜俎白氏
六帖皆載葡萄由張騫自大宛移來按本草
已具神農九種當塗熄火去騫未遠而魏文

之詔實稱中國名果不言西來自唐以前無
此論乃知大宛之種必與中國異故博望取
之比戍酒泉嘗販胡之乾名瑣瑣比中國者
差小形圓而色正赤甘美非中國可敵則予
所見庶或得之張芳洲亦有詩聞道乘槎客
相攜到漢庭何緣嘗草日先自入醫經瑣瑣
葡萄形甚細如胡椒大出土魯番性熱可發
痘疹蓋葡萄之別種耳亦云蒲萄

銀杏

銀杏葉似鴨脚古名鴨脚樹菽園禰記曰銀杏實如杏而核中有仁可食故曰仁杏今云銀杏似是而非一名公孫樹言公種而孫始得食北人稱爲白果南人亦呼之吳俗皆稱靈眼又稱白眼其木高大多歷年歲或至連抱其木理最細用作園亭顏額甚雅摹刻名書不尖筆法其花夜開晝落實大如枇杷每一

枝有百十顆八九月熟積而腐之惟取其核
卽銀杏也核白肉青煨熟食之甘香可人能
收小便令不數亦易飽仍有粳糯之分糯者
肥輒香滑粳者不堪食歐陽公詩云鴨脚生
江南名實未相浮絳囊因入貢銀杏貴中州
又云始摘纔三四歲久子漸多梅聖俞詩云
北人見鴨脚南人見胡桃識內不識外疑若
橡栗韜鴨脚類綠李其名因葉高則知是果

之見重自宋始矣其木有雌雄雄者不結實
瑣碎錄云雄者三稜雌者二稜須合二種臨
池栽之照影卽生或將雌樹鑿孔以雄木填
之無不結實農桑撮要曰二月於肥地用灰
糞種之候長成小樹次年春分前後移栽栽
時連土用草包或麻纏束方始易活若接卽
用本色此果性寒不宜頻食小兒食多者死
或云食銀杏遇毒腹脹連飲冷白酒幾盞吐

出則愈不吐則死

棗

棗樹高二三丈木堅實可刻字勝於梨木爲書坊之用而紋理極細每刻人物畫像必需之葉細而有光四五月開細白花甚香結實長可二寸許亦有上狹下闊如壺形者八月而熟味甘詩云八月剝棗是也埤雅云棗實未熟雖擊不落已熟不擊自墮筆談曰棗與棘相類皆有刺棗獨生高而少橫枝棘列生痺

而成林以此爲別其文皆從束音刺木芒刺也束而相戴立生者棗也束而相比橫生者棘也圖經本草曰大棗乾棗也棗竝生河東今近北州郡皆有而青晉絳州者特佳江南出者堅燥少脂棗之類最多郭璞注爾雅有壺棗云今江東呼棗大而銳上者爲壺壺猶瓠也有邊腰棗云子細腰今謂之鹿盧棗有擠白棗云卽今棗子白乃熟有槭酸棗云木

小實酢者有遵羊棗云實小而圓紫黑色俗呼羊矢棗楊徹齊棗云未詳有洗大棗云今河東猗氏縣出大如雞卵有煮填棗云未詳有蹶泄苦棗云味苦者有皙無實棗云不著子者有還味捻棗云還味短味也今園圃皆種蒔之亦不能別其名又其極美者則有水菱棗御棗之類皆不堪入藥蓋肌實輕虛暴服之則枯敗唯青州之種最佳蓋晉絳實大

不及青州者之肉厚相傳爲樂毅來齊所種
又名樂氏棗按今鮮棗吳越通謂之白蒲棗
其乾者率自河南山東等處來有大棗紅棗
膠棗或蒸熟或生致或熟而燃去其皮惟大
棗尤多密雲棗核細形小紹興出南棗甘膩
似密雲而形長大南都姚坊門棗最有名皆
棗中之佳品也種法選味好者春間種之候
葉始生而移栽

棗性硬故生晚
栽早者生遲也

三步一樹行

欲相當

地不耕也

欲令牛馬踐履令淨

棗性堅強不宜苗稼

若耕荒穢則蟲生須淨地堅饒實故宜踐也

元旦日出時反斧班

駁槌之名曰嫁棗

不槌則花而無實所則子萎而落也

候大蠶

入簇以杖擊其枝間振去狂花

不打花繁而實不成

全

赤卽收收法日日撼而落之爲上

半赤而收者肉未充

滿乾則色黃而皮皺將赤味亦不佳全赤久不收則皮硬復有烏雀啄之之患

曬棗

法先治地令淨

有草萊令棗臭

布椽於箔下置棗於

箔上以扒聚而復散之一日中二十度夜仍

不聚

得霜露氣速成陰雨時乃聚而苦蓋之

五六日後別擇去

紅輦者上高厨而暴之

厨上者已乾雖厚一尺亦不壞

擇去

脰爛者

脰薄江切○脰者永不乾留之徒汚棗

其未乾者曬暴

如法便民圖纂曰棗將根上發起小條移栽

俟榦如酒鍾大三月終以生子樹貼接之則

結子繁而大昔秦饑應侯請發五苑之果蔬

橡棗栗以活民孔融爲東萊賊所攻治中左

承祖以官棗賦戰士我

太祖高皇帝令民種桑聚不種者有罰亦以備
凶荒之用云爾

栗

栗四月開花其花與他花特異枝間綴花長二三寸許山人云俟其落收之點火風雨不滅圖經本草曰栗生山陰今處處有之而兗州宣州者最勝木極類櫟花青黃色似胡桃花實有房彙若拳中子必三五小者若桃李中子唯一二將熟則鱗拆子出凡栗之種類亦多栗房當心一子謂之栗楔治血尤效果中

栗最有益治腰脚宜生食之仍略暴乾去其木氣惟患風水氣不宜食以其味鹹故也衍義曰栗欲乾莫如曝欲生收莫如潤沙中藏至春末夏初尚如新收小兒不可多食生者難化熟卽滯氣隔食生蟲往往致病所謂補腎氣者以其味鹹又滯其氣耳爾雅翼云有患足弱者坐栗木下多食之至能起行日用本草云嚼生者塗瘡及罨刺不出吳郡志曰

頂山栗出常熟縣比常栗獨小香味勝絕號
麝香囊以其香而軟也微風乾之尤美每歲
所出極少土人得數十百枚則以綵囊貯之
饋送佳客此栗與朔方易州栗相類但易栗
殼多毛頂栗殼瑩淨耳瑣碎錄云栗採實時
要得披殘其枝明年益盛又云炒栗須染油
手指逐枚揩之則膜不沾肉風栗法曬乾置
麻布袋中或竹籃內懸當風處常常簸弄之

久之極清甘有風味齊民要術云栗種而不
栽栽者雖生尋死栗初熟出殼勿令見風卽
於屋內深埋溼土若路遠以韋囊盛之停二
日以上及見風者則不復生矣至春二月芽
生出而種之旣生數年不用掌近凡新栽樹
皆然惟栗尤甚十月天寒以草裹之二月乃
解便民圖纂云栗臘月及春初將種埋溼土
中待長六尺餘移栽二三月間取別樹生子

大者接之尤宜以櫟樹接或云與橄欖同食
作梅花香味宋人呼爲梅花脯

胡桃

胡桃一名核桃又名羌桃博物志曰張騫使西域還得胡桃實圓而青如銀杏剖之乃得核核內有肉白色肉外有膜黃色有小者大者有脫肉不脫肉者味脆美與榛子相近蓋佳果也圖經本草曰胡桃生北土今陝洛間多有之大株厚葉多陰實亦有房秋冬時熟採之性熱不可多食初張騫植之秦中後漸生

東土本草曰胡桃味甘平無毒食之令人肥
健潤肌黑髮多食利小便能脫人眉外青皮
染髭及帛皆黑其樹皮可染褐其木春斫皮
中出水承取沐頭至黑忠雅曰力能銷銅今
試以其肉和錢同嚼錢亦可嚙又曰胡桃入
火中燒半紅埋灰中經三五日不燼山東通
志云胡桃出濟兗青三郡青州者爲佳今商
賈販鬻悉從彼焙乾頗能致遠吳中園圃間

亦有之樹亦易長高至三五丈下種可出數
年乃生水雲錄曰種核桃將桃平埋土中卽
生若以尖縫向上則水浸仁壞不生接用本
色別有山核桃八閩通志云山核桃木高數
丈葉翠如梧桐其實堅三輔黃圖謂之萬歲
子北戶錄曰山胡桃皮厚底平狀如檳榔又
占卑國出偏核桃形如半月狀波斯人取食
之絕香美

柿

柿木實根固葉大而肥似山茶葉四月結實花
綴實臍或紅或黃甘涼可食其品不一姑蘇
志云柿出常熟東鄉者名海門柿出虞山帶
正方色如靛紅者爲方帶柿九月中皮黃卽
摘下以漸自熟慮將熟時有白頭翁來啄如
必欲久留樹上用箬包裹聞見後錄云種柿
有七絕一壽二多陰三無鳥巢四無蟲蠹五

霜葉可愛六嘉實七落葉肥大又柿葉多蝟
而枯葉則潤澤古人取以臨書歸田錄云唐
鄧間多大柿其初生澀堅實如石凡百十柿
以一槓櫨置其中

槓梓亦可

則紅熟而味極甘食

經曰以灰汁澡柿再三度乾令汁絕著器中
經十日可食瑣碎錄云紅柿摘下未熟每籃
置木瓜兩三枚柿無澀味山東通志云柿餅
出青州柿以大方名蓋肖形也又有名圓蓋

柿者青人取之製爲餅漸生霜王氏農書作
柿乾法生柿搯其厚皮捻匾向日曝乾內於
瓮中待柿霜俱出可食甚涼其霜收之甘涼
如蜜可醫口瘡及咽喉熱積圖經本草曰柿
不可與蟹同食令人腹痛作瀉別有一種柗
柿葉毛實青黑所謂梁王烏柗之柿是也八
月收柿漆每柿子一升擣碎用水半升釀四
五時榨取漆令乾漆水再取亦得可供做傘

之用便民圖纂云冬間下種待長移栽肥地
接用枰柿接及三次則全無核接桃枝則成
金桃今按佳種核自少不須接然金桃亦別
自有種不必柿本接也

橘 柚柑附

牛僧孺幽怪錄有生於橘者摘剖之有四老人
焉其一曰橘中之樂不減商山恨不能深根
固蒂耳由是有橘隱名楚屈原作離騷其橘
頌一章有曰后皇嘉樹橘采服受命不遷生
南國宋謝惠連橘賦亦曰園有嘉樹橘柚煌
煌以是知橘實佳物昔人所愛慕若此孔安
國曰小曰橘大曰柚郭璞亦云柚以橙而大

於橘溫無柚而種橙者少非土所宜也本草
載橘柚味辛溫無毒主去胸中痰熱利水穀
止嘔欬久服通神輕身長年陶隱居云此言
橘皮之功若此其實之味甘酸食之多痰無
益其說爲是隱居不敢輕注本草蓋此類也
今橘柑出南中閩粵吳楚在在有之具載圖
經譜錄其種極多茲不能盡述姑就所經見
者疏其品類一名沙橘錄云取細而甘美之

稱或曰種之沙洲之上地虛而宜於橘故其
味特珍其狀魁梧上尖下闊宛似壺形與柑
不殊而得橘名皮肉香甜皆可啖風味特遠
往時此種絕少今乃盛行葉大如掌遇霜易
枯嗅之亦不甚辣與波斯海紅相似而實不
同一名波斯橘壅腫如波斯其樹葉形狀悉
類沙橘多漿而味苦擘之亦不香近有傳盛
氏龍泉橘來者以爲異嘗之卽波斯橘耳此

種江右最多又呼撫州橘一名匾橘姑蘇志云此橘出吳江縣村落多種之以其形匾故名今按匾橘隨地皆有獨吳縣諸山所產味甘有極大者皮薄肉美中可容一指故又名穿心橘宜於早食久藏則漿少一名蛻花甜枝葉繁碎形鉅肉甘皮黃如蠟光澤可愛花落後卽堪啖故得名然亦須霜後味始全美此果耐久可蓄人多重之姑蘇志云蛻花甜

早紅其品稍下似不盡然一名南橘枝葉似
蛻花甜形狀又類襄橘但色紅形大皮薄易
潰味亦甘美品在襄橘上一名衢橘產於衢
州府之西安縣他邑皆無形甚鉅皮光色正
黃味極甘香吳下盛行品價增貴性亦易潰
取其核種於他土便不若本產之佳一名襄
橘令園圃多植之種自襄陽傳來故名然亦
有不同者有皮厚而麻形鉅味美有皮薄而

光形小味劣樹皆易植果亦耐久善藏者二
三月出之如新一名香橘與襄橘相似剖之
有一種芳香之氣味亦甘清自與襄橘不同
一名早紅橘皮黃味酸早熟亦有大如匾橘
者一名貢橘卽今所謂福橘皮薄色紅肉最
甘香本出閩地八郡皆產獨福漳來者爲最
上供之餘隨以售人載至吳中藏貯甚艱多
致溼爛獨難於無斑痕其價甚昂往嘗有一

枚易數文者近吳縣洞庭有漆礫紅疑卽此
種其美而鉅者遂能亂真由是福橘之價亦
頓減矣一名蜜橘皮薄色黃其甘如蜜擘開
甚香其枝條特長衆葉攢之而上圃中最易
辨識亦佳種也然有二種一皮麻味酢一皮
光味甘其品較然一名麻塘南形似蜜橘其
色正黃而有麻點比蜜橘稍長早熟味甘蜜
橘瓢厚此橘瓢薄而漿尤多性亦易潰一名

小沙橘形長皮薄色綠轉紅柄間臃腫味甘而清稍淡相傳爲崑山俞氏種或指爲綠橘或又指爲衢橘皆非也其枝葉卷起與南橘相近而特覺疎朗一名甜瓶橘形長皮薄其瓢可數也色紅味甘每顆六瓢多或七瓢核亦甚少此誠佳品又名糖罐又直呼之爲六瓢頭一名甜橘形長皮薄色紅皮肉相懸氣味鮮美早熟亦可久藏與貢橘相近一名朱

橘又名染血俗呼鱔血塘南皮比支柑尤紅而色光澤味甘多核品在支柑之上與柑橘相似一名支柑皮紅而色燥味頗酸枝葉疎爽籬落間及樽俎上燦然可愛其味則劣又名猪肝一名黃塘南形小色黃結子甚繁有一枝而數百實者望之可愛味酢易潰自衢州來俗名小衢橘亦必彼產爲甘在松江則名椒橘以其香似椒也一名龍泉橘形如峴

花甜稍大而圓皮色黃澤如蠟衆橘未熟此種先黃瓢肉厚而味頗酢未爲佳品橘錄載有九法一曰種治柑橘宜斥鹵之地凡圃之近塗泥者實大而繁其味尤珍耐久不損名曰塗柑販而遠適者遇塗柑則爭售方種時高者畦壟溝以泄水每株相去七八尺歲四鋤之薙盡草冬月以河泥壅其根夏時更澆以糞壤其葉沃而實繁者斯爲園丁之良二

曰始栽取朱欒核洗淨下肥土中一年而長
名曰柑淡其根芟簇簇然明年移而疎之又
一年木大如小兒之拳遇春月乃接取諸柑
之佳與橘之美者經年向陽之枝以爲貼去
地尺餘鋸截之剔其皮兩枝對接勿動搖其
根撥掬土實其中以防水土蔭護其外麻束之
緩急高下俱得所以候地氣之應接樹之法
已載於前是蓋老圃能之工之良者揮斤之

間氣質隨宜無不活者過時而不接則花實
復爲朱藥人力之有參於造化每如此三日
培植樹高及二三尺許剪其最下命根以瓦
片抵之安於土雜以肥泥實築之始發生命
根不斷則根迸於上中枝葉乃不茂盛四曰
去病木之病有二癰與蠹是也樹稍久則枝
幹之上苔蘚生焉不去則蔓衍日滋木之膏
液蔭蘚而不及枝也故幹老而枯必用鐵器

時刮去之刪其繁枝之不能華實者以通風
日以長新枝木間時有蛀屑流出必有蟲蠹
視其穴以鈎索之仍用杉木作釘以塞其孔
不然則木心受病日以凋零異時作實未能
全美柑橘每先時而黃者皆其受病於中治
之不早故也五曰澆灌圃中貴雨暘以時旱
則堅苦而不長雨則暴長而皮多拆或熟不
實而味淡必溝以泄水俾毋浸其根方亢陽

時抱甕以潤之糞壤以培之則無枯瘁之患
六曰採摘歲當重陽色未黃時有採之者名
曰摘青舟載之江浙間青柑固人所樂得然
採之不待其熟此巧於商者間或然爾及經
霜之二三夕纔盡翦遇天氣晴霽數十輩爲
群以小翦就枝間平蒂斷之輕置筐筥中護
之宜謹懼其香霧之裂則易壞霧之所漸者
亦尤畏酒香凡採者竟日不敢飲七曰收藏

採藏之日先淨掃一室密糊之勿使風入布
稻藁其間堆柑橘於地上屏遠酒氣旬日一
翻揀之遇有微損卽時揀去否則侵損附近
者寧屢汰去以待買十或僅存五六人有掘
地作坎攀枝條之垂者覆之以土至明年盛
夏時開取色味猶新但傷動枝條有妨次年
生意耳八日製治朱欒作花比柑橘絕大而
香就樹採之用箋香細作片以錫爲小甌每

入花一重則入香一重使花多於香窵花甌
之旁以溜汗液用器盛之炊畢卽撒甌去花
以液浸香明日再蒸凡三換花始暴乾入甌
器蜜盛之他時焚之如在柑林中柑橘并金
柑皆可切瓢去核漬之以蜜絕佳鄉人有用
糖燉橘者謂之藥橘入簞之灰於鼎間色乃
黑可以將遠又橘微損則去皮以瓢安竈間
用火熏之曰熏柑或更置糖蜜中味亦佳美

九曰入藥橘皮最有益於藥去盡脉則爲橘
紅青橘爲青皮皆藥之所須者大抵橘皮性
溫平下氣止蘊熱攻痰瘧服久輕身至橘子
尤理腰膝近時難得枳實人多植枸橘於籬
落間收其實剖乾之以和藥味與商州之枳
幾逼真矣枸橘又未易多得取朱藥之小者
半破之日暴以爲枳異方醫者不能辨用以
之治疾亦愈藥貴於愈疾而已何必辨其真

僞耶

柚枝葉扶蘇結實最鉅有如小斗者肉有紅白
二種其紅者味甘酸如楊梅極有風味近沈
雙槐爲福州守携歸吳中錄其核種之十年
乃生形雖偉而味頗酢白色者不足貴亦可
藏至二三月間以其少故珍之

柑類亦多其名少異橘錄云凡園之所植柑之
比橘纔十之一二大抵柑之植立甚難灌溉

鋤治少或失時至歲寒霜雪柑之枝頭殆無
生意橘則猶故也得非瓊杯玉笋目昔易闕
邪永嘉宰勾君燾有詩聲其詩曰只須霜一
顆壓盡橘千奴則黃柑位在陸吉之上不待
辨可知一名朱柑又名猪肝又名支柑支紅
而色燥味頗酸枝葉疎爽籬落間樽俎上燦
然可愛入口則劣一名溼柑形鉅而圓皮黃
味甘酸有風韻可以作湯及丁一名乾柑形

長皮純綠轉黃比溼柑差小漿少味淡凝卽
古之木柑一名紅柑皮粗葉大掐之有臭氣
比大香櫟枝柯軟弱外黃內紅味甘酸藏之
愈久愈佳一名金柑又名金橘樹本婆娑葉
細如黃楊須接或過枝而生無直脚者此柑
在橘中最細形如彈大其肉酸而皮味芳香
甘美柑橘皆以瓢此獨以皮柑橘皆以四月
開花此獨以五六月柑橘皆以小雪前後採

摘此獨俟其將熟卽採爲佳稍遲遇風雨則
忠裂味失矣歸田錄云金橘產於江西以遠
難致都人初不識明道景佑初始與竹子俱
至京師竹子太酸人不甚喜後遂不至唯金
橘清香味美置之樽俎間光彩的皪如金彈
丸誠珍果也都人初不甚貴後因溫成皇后
好食之由是價重京師或欲久留藏置菜豆
中可經時不變云橘性熱而豆性涼故能久

也又有一種牛妳金柑出廣東浙江今吾郡
最多形長如牛乳故名香味比圓者稍劣圓
者又名金豆出太倉沙頭者佳

橙 香橡附

橙木有刺而結橙經霜早黃膚澤可愛狀有似柑但圓正細實又非柑比人喜把翫之香氣馥馥可以熏袖可以茗鮮可以漬蜜其種亦異一名蜜橙皮厚而腮甘香可愛爲橙品中第一一名香橙與蜜橙相竝但香橙皮薄味酸形大如柑其葉亦尖以此爲別一名瓣橙卽名臭橙比蜜橙皮鬆味辣止可供爌及爲

膏往時橙橘尚少人皆貴重今蜜橙盛行且有伐而爲薪者矣此種先熟易潰不堪久藏唯蜜橙可藏至來春二月不壞一名柑橙比鱗橙長大味亦相似又呼大鱗橙肉亦不甚酸然不如蜜橙之佳或曰皮橙也肉柑也故以柑橙名之

香圓卽香櫟葉尖長枝間有刺植之近水易生形長大色正黃清香襲人置之窻几間頗供

清翫肉酢酒闌破之蓋不減新橙瓢可作湯
皮可作丁葉可療病有大小二種小者香或
云皮粗而形大者乃朱欒非香櫟也

汝南圃史卷之四

汝南圖史卷之五目錄

水果部

荷

芰

芡

蔗

西瓜

蒟蒻

國史

卷五

書卷齊

茨菰

汝南圃史卷之五目錄

汝南圖史卷之五

吳郡周文華含章補次

水果部

荷

爾雅曰荷芙蕖其莖茄其葉蓮其本密其花菡
萏其實蓮其根藕其中葍葍中薏釋曰芙蕖
其總名也別名芙蓉江東人呼荷菡萏蓮葉
也的蓮實也薏中心也郭云密莖下白藕在

泥中者今江東人呼荷花爲芙蓉北方人便以藕爲荷亦以蓮爲荷蜀人以藕爲茄或用其母爲花名或用根子爲母葉號此皆名相錯習俗傳誤失其正體也陸璣疏曰蓮青皮裏白子爲蓇蓇中有青爲薏長三分如鉤語曰苦如薏也埤雅曰荷總名也華葉等名具衆義故不以知爲問謂之荷也管子曰五沃之土生蓮古今注曰芙蓉一名荷花生池澤

中實曰蓮花之最秀異者也一名水芝一名
水花有赤白紅紫青黃數種然紅白二色最
多花大者至百葉周子愛蓮說云出淤泥而
不染濯清漣而不妖中通外直不蔓不枝香
遠益清亭亭靜直可遠觀而不可褻翫花之
君子也建昌府志云竝頭蓮近自浙江得種
或竝頭而開或四面而拱或葉突而臺或紛
糾而綴茜靚欹盈奇態不可名狀卒之秋露

泠泠厭而不落雖經風雨而池上無殷紅委
辦殆兼牡丹之艷與菊之操矣宋時聚景園
中有繡蓮紅辦而黃綠結實如飴此又花之
奇品也姑蘇志云蓮葍其紅花者實小而甘
其白花者實大而淡花落實出始黃中玄爾
雅翼云葍五月中生生啖脆至秋表皮黑葍
成可食可磨以爲飯輕身益氣令人強健又
可爲糜別有石蓮子衍義曰藕實就蓬中乾

者爲石蓮子本草經云藕實莖味甘平寒無

毒主補中養神益氣力除百疾久服輕身耐

老不饑延年

陶隱居云莖卽是根不用不應言乾也

宋帝時大

官作血

音

庖人削藕皮誤落血中遂解散

不疑由是醫家用藕療血多效埤雅云芙蕖

行藕如竹之行鞭節生一葉一華華葉常偶

生故謂之藕食物本草云產後忌生冷惟藕

不忌以其破血也蒸煮熟則開胃補五臟實

下焦蓮子生者動氣脹人熟者良竝宜去心
其葉及房皆破血胎衣不下酒煮服之葉帶
味苦主安胎去惡血畱好血血痢煮服之西
湖志云藕出西湖者甘脆爽口與護安村同
區眼者尤佳其花白者香而結藕紅者艷而
結蓮國史補曰蘇州進藕其最上者名雙荷
藕又名傷荷藕或云葉甘爲蟲所傷又云欲
長其根故傷其葉蘇州志云藕出吳縣黃山

南蕩者最佳花白者鬆脆且甘卽傷荷藕食之無滓他產不滿九竅此獨過之以此爲辨鎮江府志云藕以金壇爲勝花時所取曰花下藕尤甘脆今吳中所尚唯以高郵者爲貴較之他藕形色俱別皮斑黃如鐵鏽節短壯而多漿土人食之不以爲美過江則味愈佳且久藏不變爾雅翼曰葉可裹物齊師伐梁以糧運不繼調市人餽軍建康令孔奐以麥

屑爲飯荷葉裹之一宿之間得數萬裹癸辛
襍識曰曬荷葉遇雨雨所著處皆成黑點藏
荷葉則須密室見風則蛀損不堪用荷葉亦
可行酒魏正始中鄭公愨三伏之際率賓客
避暑歷城取大荷葉盛酒以簪刺葉令與柄
通傳喻之名曰碧筒其後歐陽公在揚州每
暑時宴客於平山堂遣人走邵伯取荷花千
餘朵以畫盆分插百許盆與客相間遇酒行

卽遣妓取一花傳客以次摘其葉盡處則飲
酒水雲錄云採正開荷花置小金卮其中令
歌童捧以行酒客受之左手執花柄右手分
開花瓣以口就飲其馨香風致又過碧筒矣
齊民要術種蓮子法八九月取蓮子堅黑者
於瓦上磨頭令皮薄取墐土作熟泥封之如
三指大長二寸使蒂頭平重磨去尖銳泥乾
時擲於池中重頭沉下自然周正皮薄易生

少時卽出其不磨者皮旣堅厚倉卒不能生也便民圖纂曰二月間取帶泥小藕栽池塘淺水中不宜深水待茂盛深亦不妨或糞或豆餅壅之則盛一云用煮酒瓶頭泥栽種瑣碎錄云種蓮用臘糟少許裹藕種來年花盛又云種藕法春初掘取三節無損者種入深泥令到硬土穀雨前種當年有花又云蓮藕極畏桐油就池中以手掐去荷葉中心滴桐

油數點入其中雖數頃亦盡今人家種盆荷
先用稻管泥椿實其半壅牛糞寸許隔以蘆
蓆置藕秧於上用漚中淤泥覆之若通潮水
者尤妙或云清明前種花在葉上清明後種
花在葉下

菱

菱一名菱俗謂之菱角圖經本草曰菱菱實也處處有之葉浮水面花落實生漸向水中乃熟實有二種一種四角一種兩角兩角中又有嫩皮而色紫者謂之浮菱食之尤美江淮及山東人曝其實以爲米可以當糧道家蒸作粉蜜漬食之以斷穀水果中此物最治病解丹石毒然性冷不可多食又云多食令人

腹溺或犯此急煖酒和薑汁飲一兩盞卽消
爾雅曰菱蕨攢其葉似荇白花實有紫角刺
人一名菱屈到嗜菱卽此是也亦名薜若說
文云楚謂之菱秦謂之薜若今俗但言菱菱
凡草木書皆不分別惟武陵記云四角三角
曰菱兩角曰菱其花紫色晝合宵炕隨月轉
移猶葵之隨日鏡謂之菱花以其面平光影
所成也爾雅翼云吳楚風俗當菱熟時士女

相與採之故有采菱之歌以相和爲繁華流
蕩之極招魂云涉江采菱發陽阿陽阿者采
菱之曲也風俗通殿堂象東井形刻爲荷菱
荷菱皆水物所以厭火昔人取菱花六觚之
象以爲鏡采菱之風迄今尚存山陰志云越
人謂小者爲刺菱巨者爲大菱四角者爲沙
角菱產莫盛於江陰每歲七八月菱舟環集
鑑湖中王翰詩不知湖上菱歌女幾箇春舟

在若耶王十朋風俗賦云有菱歌兮聲悄是也松江府志云菱湖泖及人家多種之有青紅二種紅者最早七月初有之名水紅菱稍遲而大曰雁來紅曰鸚歌青青而大者曰餽飽菱極大者曰蝙蝠菱其最小者曰野菱吳郡志云折腰菱唐時甚貴之今名腰菱有野菱家菱二種近世復出餽飽菱最甘香腰菱賤矣蘇州志云折腰菱多兩角乾之曰風菱

近又有軟尖花蒂二種產長洲顧邑墓實大
而味勝號顧窰蕩唐東嶼詩交游萍荇侶菰
蒲懷玉藏珍似隱儒葉底只因頭角露此生
不得老江湖霏雪錄云吳縣橫涇長洲顧窰
蕩二處所產菱大如拳七八枚可一斤他處
莫及姑蘇志云婁縣菱出崑山之婁縣村如
顧窰蕩而味略減便民圖纂云重陽後收取
菱角用密籃盛浸河內待二三月發芽隨水

深淺將竹削作火通樣式箝住老菱插入水
底若欲加肥用大竹開通其節灌糞注之水
雲錄云二月種菱先取老菱水泡三日後用
手插入泥中泥欲肥根欲深則茂

芡

芡俗名雞頭生葉平鋪水面至秋作房如雞頭
實藏其中圓白如珠蘇子容謂有五穀之甘
可以療饑真佳果也圖經本草曰雞頭初生
雷池今處處有之生水澤中葉大如荷皺而
有刺俗謂之雞頭盤花下結實其形類雞頭
故名其莖葉之嫩者名薏苡人採以爲菜茹
七八月採實方言曰北燕謂之葎青徐淮泗

謂之芡南楚江浙之間謂之雞頭本草經一名雁喙埤雅曰周官籩人加籩之實菱芡栗脯菱芡取諸水栗脯取諸陸所謂籩豆之實水陸之品也古今注曰芡一名雁頭一名芰楊升菴襍著亦以菱爲芡謂芡葉可衣菱葉不可衣遂引楚辭製菱荷以爲衣爲證恐未是埤雅引俗云荷花日舒夜斂芡花晝合宵炕此陰陽之異也爾雅翼則云芡花向日菱

花背日其陰陽不同而損益亦異似與前說
相謬矣本草經曰雞頭實味甘平無毒主濕
痺腰脊膝痛補中除暴疾益精氣強志令耳
目聰明久服輕身不饑耐老神壯梅聖俞詩
云蝟毛蒼蒼磔不死銅盤蟲蟲釘頭生吳雞
鬪敗絳幘碎海蚌扶出珍珠明蘇子由詩云
芡葉初生皺如縠南風吹開輪脫輻紫苞青
刺如蝟毛水面放花波底熟森然赤手初莫

近誰料明珠藏滿腹剖開膏液尚模糊大盃
磨聲風雨速清泉活火曾未久滿堂座客分
升掬紛然咀嚼唯恐遲勢若群雞方脫粟姑
蘇志云出吳江者殼薄色綠味腴出長洲車
坊者色黃有梗糯之分今崑山出一種皮殼
色皆綠粒大味鮮更勝於吳江便民圖纂云
秋間熟時收取老子包浸水中二三月間撒
淺水內待葉浮面移栽深水每柯離二尺許

先以麻豆餅屑拌勻河泥種之以蘆插記根
處十餘日後每柯用泥三四碗再壅

蕨

蕨叢生身似竹而實高六七尺及末抽葉似蘆
葉而大長三四尺其莖有節宋神宗問呂惠
卿蕨從蕨何也對曰凡草種之則正生甘蕨
種之則旁生菽園襍記云按六書有諧聲蕨
蕨聲蕨古遮字非會意也若蕨從蕨爲旁生
則鷓鴣螻蟲亦旁生耶其說近是又名諸蕨
南方草木狀曰諸蕨一名甘蕨交趾所生者

圍數寸長丈餘頗似竹斷而食之甚甘八閩
通志云甘苳取汁曝數日成飴入口消釋彼
人謂之石蜜南人云甘蔗可消酒又名干蔗
司馬相如太尊柘漿折朝醒是也泰康六年
扶南國貢諸蔗一丈三節自八九月已堪食
收至三四月方酸壞忠雅云其味在根梢以
漸而薄故顧愷之啖蔗自梢至根漸入佳境
春種冬成搗其汁煮之則成黑糖又以黑糖

煮之則成白糖糖之精又成糖霜容齋隨筆
曰糖霜之名唐以前無所見自古食蔗者始
爲蔗漿宋玉所謂飴飴包羔有柘漿是也其
後爲蔗飴孫亮使王門就中藏吏取支州所
獻甘蔗飴是也唐太宗遣使至摩竭陀國取
熬糖法卽詔楊州上諸蔗榨潘如其劑色味
逾於西域然只是今之砂糖蔗之技盡於此
矣不言作霜唯東坡送遂寧僧云涪江與中

冷共此一味冰冰盤薦琥珀何似糖霜美黃
魯直答梓州雍熙長老寄糖霜云遠寄蔗霜
知有味勝於崔子水晶鹽正宗掃地從誰說
我舌猶能及鼻尖則遂寧糖霜見於文字實
始二公甘蔗所在皆植獨福唐四明番禺廣
漢遂寧有糖水而遂寧爲冠四郡所產甚微
而顆碎色淺味薄僅比遂之最下者唐大曆
中有鄒和尚者始來小溪之緞山教民以造

霜之法山前後爲蔗田者十之四蔗有四色
曰杜蔗曰西蔗曰荔蔗本草所謂荻蔗也曰
紅蔗本草所謂崑崙蔗也紅蔗止堪生啖荔
蔗可作沙糖西蔗可作霜色淺土不甚貴杜
蔗綠嫩味極厚專用作霜凡蔗最困地力今
年爲蔗田者明年改種五穀以息之凡霜一
甕中品色亦自不同堆疊如假山者爲上團
枝次之甕鑑次之小顆塊又次之沙脚爲下

紫爲上深琥珀次之淺黃又次之淺白爲下
今糖霜率自福建來白如水晶不聞有紫者
豈今法更妙於古耶抑四川自有紫糖霜耶
興化府志云造黑糖法冬月蔗成取而斷之
入碓搗爛用大桶裝貯桶底旁側爲竅每納
蔗一層以灰薄灑之皆築實及滿用熱湯自
上淋下別用大桶盛之旋取入釜烹煉火候
旣足蔗漿漸稠乃取油滓點化之別用大方

盤挹置盤內遂凝結成糖其面光潔如漆其
脚粒粒如砂故又名砂糖每歲正月內煉砂
糖爲白糖其法取乾好砂糖置大釜中烹煉
用鴨卵連青黃攪之使渣滓上浮用鐵笊籬
撇取乾淨看火候足別用兩器上下相承上
曰囷胡因切下曰窩囷下尖而有竅窩內虛而
底實乃以草塞竅取煉成糖漿置囷中以物
乘熱攪之及冷糖凝定糖油墜入窩中三月

梅雨作乃用赤泥封之約半月後又易封則
糖油盡抽入窩至大小暑月乃破泥取糖其
近上者瑩白近下者稍黑遂曝乾之用木桶
裝貯九月客商販買者畢集其糖油鄉人自
買之王昭明云砂糖古無白者人亦不知所
以白之之法後有置黑糖於土牆邊牆崩爲
土所壓久而發之悉變成白乃知糖之變白
其妙全在土封殆天啓之人不及是神隱云

十月初收蔗揀節密者連稍葉入窖至來年
二月用猪毛和土犁長溝以蔗臥於溝內鬆
土蓋之候三月間苗出用肥糞或麻餅壅之
仍去旁邊小苗止畱大苗種蔗惟潮沙之地
爲宜

西瓜

西瓜蔓生其實圓碧外堅內白味甘冷可止煩
渴其子甘溫有紅黃黑白斑數色五代邵陽
令胡嶠陷虜記云嶠於回紇得瓜種以牛糞
結實大如斗以其出自西域故名西瓜松漠
紀聞曰西瓜形如匾蒲而圓色極青翠經歲
則變黃其脆類甜瓜味極甘脆中有汁尤清
冷蓋唐以前經傳所云瓜卽今之甜瓜非西

瓜也葉子奇云西瓜元世祖征西域中國始
有種其說則謬陸深豫章謾抄云南昌郡產
西瓜味不佳土人惟利其子以剝仁故江西
瓜仁充贈遺甚盛神仙傳記青登瓜太如三
斗魁玄表丹裏呈素含紅則古又未必無西
瓜也魏劉楨瓜賦云藍皮蜜裏素肌丹瓢者
此指何物豈本一類而西種特嘉故以得名
姑蘇志載西瓜出吳縣薦福山者曰薦福瓜

出崑山楊莊者曰楊莊瓜圓明村者爲圓明
瓜便民圖纂云清明時於肥地掘坑納瓜子
四粒待芽出移栽栽宜稀澆宜頻蔓短時作
綿兜每朝取螢恐其食蔓迨至蔓長宜用乾
柴就地引之能令多子若掐去餘蔓則極肥
大一云種西瓜須鬆地先一年用稻管泥浸
糞坑中一二日取出曬乾再浸再曬如此四
五次乾之至二月盡每一稻管置瓜種四粒

稀植之瓜極大而甘一云下西瓜種欲密密則氣力齊易出土俟出分栽浣花雜誌云西瓜最患移栽必子出本土者可多結又云西瓜小藤不結實謂之賊藤宜去之用豆餅於黃昏時覆根上明旦去之如此一二次則瓜甘美

勃薺

勃薺一名烏芋爾雅云芍鳧茨一名鳧茨吳俗
又名地栗爾雅翼云旣名鳧茨當是鳧好食
之耳本草烏芋二月生葉如芋唐本注云此
草一名槎牙一名茨菰兩者皆非鎮江府志
云茨菰一名燕尾草根如芋或名田酥或名
地栗混而不分總是承訛踵謬不究物理之
故按圖經本草曰烏芋今鳧茨也苗似龍鬚

而細正青色根黑如指大皮厚有毛又云食之厚人腸胃不饑服丹石人尤宜常食爲其能解毒耳崑山顧武祥作宦粵中將地粟作粉曬乾從家鄉帶去朝夕食之以解瘴毒又能濟凶年東觀漢記王莽末南方枯旱民多餓群入澤中掘鳧茨而食本草衍義曰烏芋卽今蒟蒻皮厚色黑肉硬白者謂之豬蒟蒻皮薄色淡紫肉軟者謂之羊蒟蒻正二月人

採食之此二種藥中罕用唯荒歲人多採以
充糧興化府志云其性能毀銅取銅錢合鳧
茨食之皆碎姑蘇志云出吳江華林者色紅
味美不能耐久出長洲陳灣村者色黑形大
帶泥藏之可以致遠有白皮者擦小兒花癬
瘡有驗便民圖纂曰正月畱種取大而正者
待芽生理泥缸內二三月復移水田中至茂
盛於小暑前分種每柯離尺四五寸冬至前

後起之耘撫與種稻同豆餅或糞皆可壅

茨菰

茨菰一名剪刀草與蒻薹根皆著土中可食然蒻薹外紅黃而中白味甘茨菰則內外皆白味稍劣不可生啖蒻薹葉細茨菰葉粗判然二物而說者多溷之姑蘇志直以茨菰爲烏芋蓋承本草之誤殊不知烏芋之名止可加於蒻薹以其色黑也茨菰正白豈得言烏圖經本草曰剪刀草生江湖及京東近水河溝

沙磧中味甘微苦寒無毒葉如剪刀形莖幹似嫩蒲又似三稜苗甚軟其色深青綠每叢十餘莖內抽出一兩莖上分枝開小白花四瓣藥深黃色根大者如杏小者如杏核色白而瑩滑五六月採葉正二月採根一名慈菰一名白地栗一名河鳧茨土人爛擣其莖葉如泥塗傳諸惡瘡腫及小兒游癰丹毒其腫立消四明郡志曰茨菰葉有兩岐如燕尾

而大白花三出一莖十二實農桑撮要曰三
月種茨菰先掘深坑用蘆蓆鋪墊排茨菰於
上用泥覆水浸之便民圖纂曰臘月間折取
嫩芽插於水田來年四五月如插秧法種之
每柯離尺五許田最宜肥

汝南圃史卷之五